




初唐四傑集
 楊盈川集
 丁

初唐四傑集
 楊盈川集
 十

土岐文庫
 文庫17
 W54
 4



文庫 17
W54
4

唐書文苑傳

楊炯華陰人伯祖虔威武德中官至右衛將軍炯幼聰敏博學善屬文神童舉拜校書郎為崇文館學士儀鳳中太常博士蘇知幾上表以公卿以下冕服請別立節文勅下有司詳議炯獻議議載本集由是竟寢知幾所請炯俄遷詹事司直則天初坐從祖弟神讓犯逆左轉梓州司法參軍秩滿遷授盈川令如意元年七月望日宮中出孟蘭盆分送佛寺則天御洛南門與百僚觀之炯獻孟蘭盆賦詞甚雅麗炯至官為政殘酷人吏動不如意

楊盈川集

本傳

二 鼓雅居

昭和六十年二月一日
土岐善吉氏
寄贈

010185191368

輒榜殺之又所居府舍多進士亭臺皆書榜額爲之美名大爲遠近所笑無何卒官中宗卽位以舊僚追贈著作郎文集三十卷炯與王勃盧照隣駱賓王以文詞齊名海內稱爲王楊盧駱亦號爲四傑炯聞之謂人曰吾愧在盧前恥居王後當時議者亦以爲然其後崔融李嶠張說俱重四傑之文崔融曰王勃文章宏逸有絕塵之迹固非常流所及炯與照隣可以企及盈川之言信矣說曰楊盈川文思如懸河注水酌之不竭旣優於盧亦不減王恥居王後信然愧在盧前謙也

楊盈川集目錄

卷一

賦

渾天賦 并序

青苔賦

卧讀書架賦

幽蘭賦

老人星賦

庭菊賦 并序

浮漚賦

孟蘭盆賦

卷二

五言古詩

廣溪峽

巫峽

西陵峽

奉和上元醮宴應詔

五言律詩

從軍行

劉生

送臨津房少府

送豐城王少府

送鄭州周司功

驄馬

出塞

有所思

梅花落

折楊柳

紫騮馬

戰城南

送梓州周司功

送楊處士反初卜居曲江

五言排律

送劉校書從軍

遊廢觀

和石侍郎山莊

和崔司空傷姬

和騫右丞省中暮望

和劉侍郎入唐隆觀

和輔先入昊天觀

和酬虢州李司法

和旻上人傷果禪師

和鄭讐校內省眺矚思鄉懷友

和劉長史答十九兄

送李庶子致仕還洛

早行

途中

五言絕句

夜送趙縱

附 炯姪女臨鏡曉妝

卷三

序

王勃集序

宴族人楊八宅序

送東海孫尉詩序

登祕書省閣詩序

崇文館宴集詩序

李舍人山亭詩序

送徐錄事詩序

送并州旻上人詩序

晦日藥園詩序

羣官尋楊隱居詩序

宴皇甫兵曹宅詩序

卷四

碑

大唐益州大都督府新都縣學先聖廟堂碑文
并序

遂州長江縣先聖孔子廟堂碑

卷五

碑

少室山少姨廟碑

銘

梓州惠義寺重閣銘
并序

表

為劉少傅等謝勅書慰勞表

議

公卿以下冕服議

卷六

神道碑

後周青州刺史齊貞公宇文公神道碑

後周明威將軍梁公神道碑

唐同州長史宇文公神道碑

卷七

神道碑

唐恒州刺史建昌公王公神道碑

唐贈荊州刺史成公神道碑

益州溫江縣令任君神道碑

原州百泉縣令李君神道碑

卷八

神道碑

瀘州都督王湛神道碑

唐右將軍魏哲神道碑

唐上騎都尉高君神道碑

唐昭武校尉曹君神道碑

卷九

墓誌

鄴國公墓誌銘

常州刺史伯父東平楊公墓誌銘

杜袁州墓誌銘

隰川縣令李公墓誌銘

李懷州墓誌銘

從弟去盈墓誌銘

從弟去溢墓誌銘

從甥梁錡墓誌銘

彭城公夫人爾朱氏墓誌銘

伯母東平郡夫人李氏墓誌銘

卷十

行狀

中書令汾陰公薛振行狀

左武衛將軍成安子崔獻行狀

祭文

為薛令祭劉少監文

同詹事府官寮祭郝少保文

為梓州官屬祭陸鄴縣文

祭汾陰公文

楊盈川集目錄

序
卷一
卷二
卷三
卷四
卷五
卷六
卷七
卷八
卷九
卷十
卷十一
卷十二
卷十三
卷十四
卷十五
卷十六
卷十七
卷十八
卷十九
卷二十

楊盈川集卷一

賦

渾天賦 并序

顯慶五年炯時年十一待制宏文館上元三年始以應
制舉補校書郎朝夕靈臺之下備見銅渾之象尋返初
服卧病邱園二十年而一徙官斯亦拙之效也代之言
天體者未知渾蓋孰是代之言天命者以為禍福由人
故作渾天賦以辨之其辭曰客有為宣夜之學者喟然
而言曰旁望萬里之橫山而皆青翠俯察千仞之深谷



而皆黝黑蒼蒼在上非其正色遠而望之無所至極日月載其元氣所以或中或昃星辰浮於太空所以有行有息故知天常安而不動地極深而不測可以作觀象之準繩可以作談天之楷式有稱周髀之術者蹶然而笑曰陽動而陰靜天迴而地游天如倚蓋地若浮舟出於卯入於酉而生晝夜交於奎合於角而有春秋天則西北旣傾而三光北轉地則東南不足而萬水東流比於圓首前臨智者後不能覆背方於執炬南稱明者北可以爲幽此天與而不取惡遑遑而更求太史公有粹

其客乃盱衡而告曰楚旣失之齊亦未爲得也言宣夜者星辰不可以闊狹有常言蓋天者刻漏不可以春秋各半周三徑一遠近乖於辰極東井南箕曲直殊於河漢明入於地葛稚川所以有辭曰應於天桓君山由其發難假蘇秦之不死旣莫能知其說儻隸首之重生亦不能成其算也二客嘗亦知渾天之事歟請爲左右揚摧而陳之原夫杳杳冥冥天地之精混混沌沌陰陽之本何太虛之無礙俾造化之多端南溟玉室之宮爰皇是宅西極金臺之鎮上帝攸安地則方如碁局天則圓

之津壽星之野箕爲傲客房爲駟馬天皇對於攝提皇
極臨於宦者左角右角兩曜之所巡行陰間陽間五星
之所次舍後宮掌於燕息太子承於冢社宗人宗正內
外敦敘於家邦市樓市垣貨殖畢陳於天下北宮則靈
龜潛匿騰蛇伏藏瓠瓜宛然而獨處織女終朝而七襄
登漸臺而顧步御輦道而徜徉聞雷霆之隱隱聽枹鼓
之礧礧南斗主爵祿東壁主文章須女主布帛牽牛主
關梁羽林之軍所以除暴亂壘壁之陣所以備非常西
宮則天潢咸池五車三柱奎爲封豕參爲白虎胃爲天

倉婁爲眾聚旄頭之北宰制其邊陲天畢之陰蓄洩其
雷雨大陵積尸之肅殺參旗九斿之部伍樵蘇之地出
入於園苑萬億之資填積於倉庾南宮則黃龍賦象朱
鳥成形五帝之座三光之庭傷成於鉞誅成於鑕禍成
於井德成於衡執法者廷尉之曹大臣之象少微者儲
君之位處士之星天弧直而狼顧軍市曉而雞鳴三川
之交鶉火通其耀七澤之國翼軫寓其精南河北河象
闕於是乎增峻左轄右轄邊荒於是乎自寧乃有金之
散氣水之精液法渭水之橫橋像昆明之刻石歲時占

其水旱滄溟應其潮汐織女之石漢家之使可尋飲牛
之津海上之人易覲日也者眾陽之長人君之尊天雞
曉唱靈烏晝跋扶桑臨於大海若木照於崑崙太平太
蒙所以司其出入南至北至所以節其寒溫龍山銜燭
不能議其光景夸父棄策無以方其駿奔月也者羣陰
之紀上天之使異姓之王后妃之事方諸對而明水浹
重暈匝而邊風駛裁盈蚌蛤則虜騎先侵適鬪麒麟則
暗虎潛值五星者木爲重華火爲熒惑鎮居戊巳斯爲
土德太白主西辰星主北俯察人事仰觀天則比參右
肩之黃如奎火星之黑五材所以致用七政於焉不忒
同舍而有四方分天而利中國赤角犯我城黃角地之
爭五星同色天下偃兵趨前舍爲盈退後舍爲縮盈則
侯王不寧縮則軍旅不復或向而或背或遲而或速金
火犯之而甚憂歲鎮居之而有福觀眾星之部署歷七
曜之驅馳定天下之文所以通其變見天下之蹟所以
象其宜然後播之以風雨威之以霜霰或吐霧而蒸雲
或擊雷而鞭電一旬而太平感膚寸而天下遍白日爲
之晝昏恒星爲之不見爾乃重明合璧五緯連珠青氣

夜朗黃雲晝扶握天鏡授河圖若曰賜之以福此明王
聖帝之休符至如怪雲祆氛冬雷夏雪日暈長虹星芒
伏鼈陰有餘而地動陽不足而天裂若曰懼之以災此昏
主亂君之妖孽昔者顓頊之命重黎司天而司地陶唐
之分仲叔宅西而宅東其後宋有子韋鄭有裨竈魏有
石氏齊有甘公唐都之推星王朔之候氣周文之視日
吳範之占風有以見天地之情狀識陰陽之變通詩云
謂天蓋高語曰惟天爲大至高而無上至大而無外四
時行焉萬物生焉羣神莫尊於上帝法象莫大於皇天

靈心不測神理難詮日何爲兮右轉天何爲兮左旋盤
古何神兮立天地巨靈何聖兮造山川螟何細兮師曠
清耳而不聞離朱拭目而無見鵬何壯兮搏扶搖而翔
九萬運海水而擊三千龜與蛇兮異其短長之質椿與
菌兮殊其小大之年鐘何鳴兮應霜氣劍何伏兮動星
躔列子何方兮御風而有待師門何術兮驗火而登仙
魯陽麾戈兮轉於西日陶侃折翼兮登於上元女何寃
兮化精衛帝何恥兮爲杜鵑爭疆理者有零陵之石聞
弦歌者有蓋山之泉若怪神之不語夫何述於此篇以

天乙之武也焦土而爛石以唐堯之德也襄陵而懷山以顏回之賢也貧居於陋巷以孔邱之聖也情希於執鞭馮唐入於郎署也兩君而未識揚雄在於天祿也三代而不遷桓譚思周於圖讖也忽焉不樂張衡術窮於天地也退而歸田我無爲而人自化吾不知其所以然而然

青苔賦

粵若稽古聖皇重暉月光開博望之苑闢思賢之堂華館三襲凋軒四下地則經有省書坊人則後車而先馬

相彼草木兮或有足言者吁嗟青苔今可得而聞也何如靈山偃蹇巨壁崔嵬畫于峰而錦照圖萬壑而霞開王孫遊兮山之隈披薜荔兮踐莓苔悵容與兮徘徊一去千年兮時不復來至若圓潭寫鏡方流聚玉苔何水而不清水何苔而不綠漁父遊兮漢川曲歌滄浪兮濯吾足桂舟橫兮蘭柁觸浦澈邈迴兮心斷續別有崇臺廣廈粉壁椒塗梁木蘭兮椽璫瑁草離合兮樹珊瑚白露下蒼苔蕪暗瑤砌澁瓊鋪有美人兮向隅應閉門兮脚躅心震蕩兮意不愉顏如玉兮泪如珠請循其本也

見商羊兮鼓舞召風伯兮電赴占顧免兮離畢星雷闐
闐兮雨冥冥浩兮蕩兮見潢汙之滿庭倏兮忽兮視苔
蘚之青青爾其爲狀也羃歷綿密浸淫布濩斑駁兮長
廊黃綠兮古樹肅兮若遠山之松柏汎兮若平郊之烟
霧春澹蕩兮景物華承芳卉兮藉落花歲崢嶸兮日云
暮迫寒霜兮犯危露觸類而長其生也蕃莫不文階兮
鏤瓦碧地兮青垣別生分類西京南越則烏韭兮綠錢
金苔兮石髮苔之爲物也賤苔之爲德也深夫其爲讓
也每違燥而居溼其爲謙也常背陽而卽陰重局祕宇
兮不以爲顯幽山窮水兮不以爲沈有達人卷舒之意
君子行藏之心唯天地之大德匪予情之所任

卧讀書架賦

儒有傳經在乎致遠力學在乎請益士安號於書淫元
凱稱於傳癖高眠孰可詎貽邊子之嘲甘寢則那寧恥
宰予之責伊國工而嘗巧度山林以爲格既有奉於詩
書固無違於枕席朴斲初成因夫美名兩足山立雙鈎
月生從繩運斤義且得於方正量柄製鑿術仍取於縱
橫功因期於學殖業可究於經明不勞於手無費於目

開卷則氣雜香芸挂編則色聯翠竹風清夜淡每待遽
遽之覺日永春深常偶便便之腹股因茲而罷刺膺由
是而無伏庶思覃於下幃豈遽留而更讀其利何如其
樂只且巾遂挂於簾幌履誰曳於階除每偶草元之字
不親非聖之書比角枕而嗟若匹瑤琴而病諸爾其臨
牕有風閉戶多雪自得陶潛之興仍秉袁安之節既幽
獨而多閒遂憑茲而徧閱讀易則期於素隱習禮則防
於志悅儻叔夜之神交固周公之夢絕其始也一木所
爲其用也萬卷可披墨浸之前謂江帆之乍至書林之
下若雲翼之新垂動靜隨於語默出處任於輓推必欲
事於所事實斯焉而取斯因謂之曰爾有卷兮爾有舒
爲道可以集虛爾有方兮爾有直爲行可以立德濟筆
海兮爾爲舟航騁文囿兮爾爲羽翼故吾不知夫不可
聊逍遙以宴息

幽蘭賦

惟幽蘭之芳草稟天地之純精挹青紫之奇色挺龍虎
之嘉名不起林而獨秀必固本而叢生爾乃丰茸十步
綿連九畹莖受露而將低香從風而自遠當此之時叢

蘭正滋美庭幃之孝子循南陔而采之楚襄王蘭臺之
宮零落無叢漢武帝猗蘭之殿荒涼幾變聞昔日之芳
菲恨今人之不見至若桃花水上佩蘭若而續魂竹箭
山陰坐蘭亭而開宴江南則蘭澤爲洲東海則蘭陵爲
縣隰有蘭兮蘭有枝贈遠別兮交新知氣如蘭兮長不
改心若蘭兮終不移及夫東山月出西軒日晚授燕女
於春闈降陳王於秋坂乃有送客金谷林塘坐曛鶴琴
未罷龍劍將分蘭缸熠熠蘭麝氛氲舞袖迴雪歌聲遏
雲度清夜之未央酌蘭英以奉君若夫靈均放逐離羣
散侶辭郢郢之南都下瀟湘之北渚步遲遲而適越心
鬱鬱而懷楚徒眷戀於君王斂精神於帝女汀洲兮極
目芳菲兮襲予思公子兮不言結芳蘭兮延佇借如君
章有德通神感靈懸車舊館請老山庭白露下而警鶴
秋風高而亂螢循階除而下望見秋蘭之青青重曰若
有人兮山之阿紉秋蘭兮歲月多思握之兮猶未得空
佩之兮欲如何乃拙琴操爲幽蘭之歌歌曰幽蘭生矣
於彼朝陽含雨露之津潤吸日月之休光美人愁思兮
採芙蓉於南浦公子忘憂兮樹萱草於北堂雖處幽林

與窮谷不以無人而不芳趙元淑聞而嘆曰昔聞蘭葉
據龍圖復道蘭林引鳳雛鴻歸燕去紫莖歇露往霜來
綠葉枯悲秋風之一敗與蒿草而爲芻

老人星賦

赫赫宗周皇天降休麗哉神聖皇天降命開網布網發
號施令河出圖兮五雲集天垂象兮三光映南極之庭
老人之星煜煜燭燭煌煌熒熒秋分之旦見乎丙春分
之夕入乎丁配神山之呼萬歲符德水之兆千齡晃如
金粟燦若銀燭比秋草之一螢狀荆山之片玉渾渾鯨

熊懸紫貝於河宮奕奕曄曄曜明珠於漢水其光也如
丹其大也如李稽元命之攸述按星經之所紀見則化
平主昌明則天下多士經始靈臺嵯峩崔巍星則唐都
講藝氣則王朔呈材晝觀雲物夜察昭回覩南郊之炳
耀欣北極之康哉三公輔弼庶官文武獻仙壽兮祝堯
奏昌言兮拜禹瞻太霄而踴躍伏前庭而俯僂萬人於
是和歌百獸於焉率舞穆穆神皇受天之祥邈矣台州
之北窅然汾水之陽貞明也者日月同光貞觀也者天
地爲常有混成之獨立運元氣之茫茫若夫大虹流渚

金天當宁大電繞樞軒轅受圖殷馘則黃星見楚雷煥
則紫氣臨吳青方半月東井聯珠辰極之齊七政泰階
之平六符雖前皇之盛德又何以加於此乎至若甘露
溢醴泉出萸莢生嘉禾實鳳凰丹彩騶虞白質南海無
波東風入律比夫皇穹之錫壽何足以談其萬一聖上
猶復招列仙擇羣賢日慎一日元之又元兵戈不起至
德承天臣爛作頌皇家萬年

庭菊賦

并序

庭菊美貞芳也天子幸於東都皇儲監守於武德之殿
以門下內省爲左春坊今庶子裴公所居卽黃門侍郎
之廳事也其庭有菊焉中令薛公昔拜瑣闥此焉遊處
今兼左庶子止於東廳薨宇連接洞門相向每罷朝之
後未嘗不遊於斯詠於斯覽叢菊於斯歎其君子之德
命學士爲之賦是日也薛凱以親賢爲洗馬田巖以幽
貞爲學士高元思張師德以至孝託後車顏強學沈尊
行以博聞兼侍讀周琮李憲王祖英曹叔文以儒術進
崔融徐彥伯劉知幾石抱忠以文章顯德行則許子豐
耆舊則權無二駱續則詰訓之前識張相則莊老之後

興並承高命咸窮體物小子託於吹竽之末敢闕其詞
哉遂作賦云

日之貞矣于彼重陽菊之榮矣于彼華坊含天地之精
氣吸日月之清光雲布霧合箕舒翼張鬱兮蔓衍郁兮
芬芳珉枝金萼翠葉紅芒其在夕也言庭燎之晰晰其
向晨也謂明星之煌煌爾其萬里年華九州春色花的
爍兮如錦草綿連兮似織當此時也和其光同其塵應
春光而早植及夫秋星下照金氣上騰風蕭蕭兮瑟瑟
霜刺刺兮稜稜當此時也弱其志强其骨獨歲寒而晚

登雨還風去天長地久純黃象於后土故尋藥而菊衣
輕體御於神仙故登山而菊酒文資採之而羽化康公
服之而不朽東極於是長生南陽以之眉壽胡太尉之
允誠光輔漢庭萬幾理秦階平及暮年華髮垂肩秋菊
落英蠲邪滌瘵於焉永貞鍾太傅之家聲彝倫魏室道
合鹽梅功成輔弼降文皇之命脩彭祖之術保性和神
此焉終吉君章請老歲久懸車秋風生兮北園夕白露
溼兮前階虛佇閒庭之曠邈對涼菊之扶疎人生行樂
孰知其餘淵明解印退歸田野山鬱律兮萬里天蒼莽

兮四下憑南軒以長嘯坐東籬而盈把歸去來兮何爲者若此窈窕重闈亘青瑣兮接黃扉深沈大壯通肅成兮連博望乃有菴鄉貴族薛縣名家共汾河之鼎氣同庶子之春華朝遊夕處徘徊顧慕嘆搖落於三秋偉貞芳於十步伊纖莖之菲薄荷君子之恩遇不羨池水之芙蓉願比瑤山之桂樹歲如何其歲已秋叢菊芳兮庭之幽君子至止悵容與而淹留歲如何其歲將逝叢菊芳兮庭之際君子至止聊從容以卒歲

浮漚賦

在霖霖之可翫惟浮漚而已矣况曲澗兮增波復坳塘兮漲水霑滴瀝兮行注階潺湲而浪起寸步百川咫尺千里於是乍明乍滅時行時止排雨足而分規擘波心而對峙輕盈徘徊容與庭隈狀若初蓮出浦映清波而未開又似繁星落曙耿斜漢而將迴合散消息安有常則倏來忽往不可爲象雨密稠生風牽亂上若乃空濛采一作來 襄浩汗浮天流平舊沼派溢新泉分容對出吐映均鮮觸流萍而欲散礙浮芥而還連光凌虛而半動影倒水而分圓始參差而別趣終宛轉以同渰歷亂踟

躡漂沸縈紆細而察之若美人臨鏡開寶曆大而望也
若馮夷剖蚌列明珠逐風波而澹蕩乃變化而須臾迹
均顯晦妙合虛無同至人之體道亦隨時而不拘夫其
得坻則止乘風則逝處上下而無窮任推移而不繫似
君子之從容常卷舒而不滯故其在陽則隱在陰則出
泄泄悠悠匪徐匪疾因自然以見體託行潦以凝質類
達人之脩身故不欺於暗室蕩薄猷澮鼓舞洲渚其生
兮若浮其居兮若旅雲銷雨霽寂無處所唯斯物之靡
依獨含情而應機暫假有而示潔終淪空而匿輝苟無
心以自累夫何適而有違

孟蘭盆賦

粵大周如意元年秋七月聖神皇帝御洛城南門會十
方賢眾蓋天子之孝也渾元告秋義和奏曉太陰望兮
圓魄皎闔闔開兮涼風嫋四海澄兮百川晶陰陽肅兮
天地宵掃離宮清重閣設黃邸張翠幕鸞飛鳳翔睽賜
倏爍雲舒霞布翕赫忽霍陳法供飾孟蘭壯神功之妙
物何造化之多端青蓮吐而非夏頰果搖而不寒銅鐵
銀錫瓊琳琅玕映以甘泉之玉樹冠以承露之金盤憲

章三極儀形萬類上寥廓兮法天下安貞兮象地殫怪
力窮神異少君王子掣曳曳兮若來王女瑤姬翩躑躅
兮必至鳴鸛鷓與鸞鷲舞鷓鷄與翡翠毒龍拏兮赫然
狂象奔兮沈醉怖魍魎潛魑魅離婁明目不足見其精
微匠石洗心不足徵其奧祕續續紛紛氛氲氲五色
成文若榮光休氣發彩於重雲奮奮粲粲煥煥爛爛三
光啟旦若合璧連珠耿耀於長漢夫其遠也天台傑起
繞之以赤霞夫其近也削成孤峙覆之以蓮花晃兮瑤
臺之帝室絕兮金闕之仙家其高也上諸天於大梵其
廣也遍諸法於恒沙上可以薦元符於七廟下可以納
羣動於三車者也於是乎騰聲名列部伍前朱雀後元
武左蒼龍右白虎環衛匝羽林周雷鼓八面龍旂九旂
星戈耀日霜戟含秋元公以位百寮乃入鳴佩鏘鏘高
冠岌岌規矩中威容翕無族談無錯立若乃山中禪定
樹下經行菩薩之權現如來之化生莫不汪洋在列歡
喜充庭天人儼而同會龍象寂而無聲聖神皇帝乃冠
通天佩玉璽冕旒垂目紉纊塞耳前後正臣左右直史
身爲法度聲爲宮徵穆穆然南面以觀矣八枝初會四

影高懸上妙之座取於燈王之國大悲之飯出於香積
之天隨藍寶味舍衛金錢麩爲山兮酪爲沼花作雨兮
香作烟明因不測大福無邊鏗九韶撞六律歌千人舞
八佾孤竹之管雲和之瑟麒麟在郊鳳凰蔽日天神下
降地祇咸出於是乎上公列卿大夫學士再拜稽首而
言曰聖人之德無以加於孝乎散元氣運洪爐斷鼉足
受龍圖定天寶建皇都至如立宗廟平主臬繡栢文楣
山窠藻祝昭穆敘樽壘設以覲嚴祖之耿光以揚先皇
之大烈孝之始也考辰耀制明堂廣四脩一上圓下方

布時令合烝嘗配天而祀文考配地而祀高皇孝之中
也宣大乘昭羣聖光祖考登靈慶發深心展誠敬刑於
四海加於百姓孝之終也夫孝始於顯親中於禮神終
於法輪武盡美矣周命維新聖神皇帝於是乎唯寂唯
靜無營無欲壽命如天德音如玉任賢相惇風俗遠佞
人措刑獄省遊宴披圖籙捐珠璣寶菽粟罷官之無事
恤人之不足鼓天地之化溘作皇王之軌躅太陽夕乘
輿歸下端闈入紫微

楊盈川集卷一

番禺沈葆和初校

番禺陶福祥覆校

楊盈川集卷二

五言古詩

廣溪峽

廣溪三峽首曠望兼川陸山路繞羊腸江城鎮魚腹喬
 枝百丈偃飛水千尋瀑驚浪迴高天盤渦轉深谷漢氏
 昔云季中原爭逐鹿天下有英雄襄陽有龍伏常山集
 軍旅永安興版築池臺忽已傾邦家遽淪覆庸才若劉
 禪忠佐爲心腹設險猶可存當無賈生哭

巫峽

三峽七百里惟言巫峽長重巖窅不極疊嶂凌蒼蒼絕壁橫天險莓苔爛錦章入夜分明見無風波浪狂忠信吾所蹈泛舟亦何傷可以涉砥柱可以浮呂梁美人今何在靈芝徒自芳山空夜猿嘯征客淚沾裳

西陵峽

絕壁聳萬仞長波射千里盤薄荆之門滔滔南國紀楚都昔全盛高邱烜望祀秦兵一旦侵夷陵火潛起四維不復設關塞良難恃洞庭且忽焉孟門終已矣自古天地闢流爲峽中水行旅相贈言風濤無極已及余踐斯

地瓌竒信爲美江山若有靈千載伸知己

奉和上元酺宴應詔

甲乙遇災年周隋送上弦祆星六丈出沴氣七重懸赤縣空無主蒼生欲問天龜龍開寶命雲火昭靈慶萬物覩真人千秋逢聖政祖宗元澤遠文武休光盛大號域中平皇威天下驚參辰昭文物宇宙浹聲明漢后三章令周王五代兵匈奴窮地角本自遠正朔驕子起天街由來虧禮樂一衣掃風雨再戰夷屯剝清明日月且蕭索烟雲渙寒暑旣平分陰陽復貞觀惟神諧妙物乃聖

符幽贊下武發禎祥平階屬會昌金泥封日觀璧水市
明堂業盛勳華德輿包天地皇孝思義罔極易禮光前
式天煥三辰輝靈書五雲色敬時窮發斂卜代盈千億
五緯聚華軒重光入望圓公卿論至道天子拜昌言雷
解初開出星空即便元瑤臺涼景薦銀闕秋陰徧百戲
騁魚龍千門壯宮殿深仁洽蠻徼愷樂周寰縣宣室召
羣臣明庭禮百神仰德還符日霑恩更似春襄城非牧
豎楚國有巴人

五言律詩

從軍行

烽火照西京心中自不平牙璋辭鳳闕鐵騎遶龍城雪
暗凋旗畫風多雜鼓聲寧爲百夫長勝作一書生

劉生

卿家本六郡年長入三秦白璧酬知己黃金謝主人劍
鋒生赤電馬足起紅塵日暮歌鐘發喧喧動四隣

送臨津房少府

岐路三秋別江津萬里長烟霞駐征蓋弦奏促飛觴階
樹含斜日池風泛早涼贈言未終竟流涕忽沾裳

送豐城王少府

愁結亂如麻長天照落霞
離亭隱喬樹溝水浸平沙
左尉才何屈東關望漸賒
行看轉牛斗持此報張華

送鄭州周司功

漢國臨清渭京城枕濁河
居人下珠淚賓御促驪歌
望極關山遠秋深烟霧多
唯餘三五夕明月暫經過

驄馬

驄馬鐵連錢長安俠少年
帝畿平若水官路直如弦
夜玉妝車軸秋金鑄馬鞭
風霜但自保窮達任皇天

出塞

塞外欲紛紛雌雄猶未分明
堂占氣色華蓋辨星文
二月河魁將三千太乙軍
丈夫皆有志會是一作見立功勳
有所思

賤妾留南楚征夫向北燕
三秋方一日少別比千年
不掩頰紅縷無論一作能數綠錢
相思明月夜迢遞白雲天

梅花落

牕外一株梅寒花五出開
影隨朝日遠香逐便風來
泣對銅鉤障愁看玉鏡臺
行人斷消息春恨幾徘徊

折楊柳

邊地遙無極征夫去不還
秋容凋翠羽別淚損紅顏
望斷流星驛心馳明月關
藁砧何處在楊柳自堪攀

紫騮馬

俠客重周遊金鞭控紫騮
蛇弓白羽箭鶴轡赤茸鞦
發跡來南海長鳴向北州
匈奴今未滅畫地取封侯

戰城南

塞北途遼遠城南戰苦辛
幢旗如鳥翼甲冑似魚鱗
凍水寒傷馬悲風愁殺人
寸心明白日千里暗黃塵

送梓州周司功

御溝一相送征馬屢盤桓
言笑方無日離憂獨未寬
舉杯聊勸酒破涕暫為歡
別後風清夜思君蜀路難

送楊處士反初卜居曲江

鴈門歸去遠垂老脫袈裟
蕭寺休為客曹溪便寄家
綠琪千歲樹黃蘗四時花
別怨應無限門前桂水斜

五言排律

送劉校書從軍

天將下三宮星門召五戎
坐謀資廟畧飛檄佇文雄
赤

玉流星劍烏號明月弓秋陰生蜀道殺氣繞湟中風雨
何年別琴樽此日同離亭不可望溝水自西東

遊廢觀

青嶂倚丹田荒涼數百年猶知小山桂尚識大羅天藥
敗金爐火苔昏玉女泉歲時無壁畫朝夕有階烟花柳
三春節江山四望懸悠然出塵網從此狎神仙

和石侍郎山莊

烟霞非一作排俗字一作累巖壑只幽居水浸何曾畝荒郊
不復鋤影濃山樹密香淺澤花疎闊塹防斜徑平堤夾

小渠蓮房若個實竹節幾竿虛蕭然隔城市酌醴焚一作

夢枯魚

和崔司空傷姬

昔時南浦別鶴怨寶琴絃今日東方至鸞銷珠鏡前水
流銜砌咽月影向牕懸妝匣悽餘粉薰爐滅舊烟晚庭
摧玉樹寒帳委金蓮佳人不再得白一作雲日幾千年

和蹇右丞省中暮望

故事閒臺閣仙門藹已深舊章窺複道雲幌肅重陰元
律葭灰變青陽斗柄臨年光搖樹色春氣繞蘭心風響

高牕度流痕曲岸侵天門總樞轄人鏡辨衣簪日暮南宮靜瑤華振雅音

和劉侍郎入唐隆觀

福地陰陽合仙都日月開山川臨四險城樹隱三臺伏檻排雲出飛軒遶澗迴參差凌倒影瀟灑軼浮埃百果珠爲實羣峯錦作苔懸蘿暗疑霧瀑布響成雷方士燒丹液真人泛玉杯還如問桃水更似得蓬萊漢帝求仙日相如作賦才自然金石奏何必上天台

和輔先入昊天觀

遁甲爰皇里占星太乙宮天門開奕奕佳氣鬱葱葱碧落三乾外黃圖四海中邑居環弱水城闕抵新豐玉檻崑崙側金樞地軸東上真朝北斗元始詠南風漢君祠五帝淮王禮八公道書藏竹簡靈液灌梧桐草茂瓊階綠花繁寶樹紅石樓紛似畫地鏡淼如空桑海年應積桃源路不窮黃軒若有問三月住崆峒

和酬虢州李司法

脣齒標形勝關河壯邑居寒山抵方伯秋水面鴻臚君子從遊宦忘情任卷舒風霜下刀筆軒蓋擁門閭平野

芸黃遍長洲鴻雁初菊花宜泛酒蒲葉好裁書昔我芝
蘭契悠然雲雨疎非君重千里誰肯惠雙魚

和旻上人傷果禪師

淨業初中日浮生大小年無人本無我非後亦非前簫
鼓旁喧地龍蛇直應天法門摧棟宇覺海破舟船書鎮
秦王餉經文宋國傳聲華周百億風烈被三千蕪沒青
園寺荒涼紫陌田德音殊未遠拱木已生煙

和鄭讐校內省眺矚思鄉懷友

銅門初下辟石館始沈研遊霧千金字飛雲五色牋樓
臺橫紫氣城闕俯青田暄入瑤房裏春迴玉宇前霞文
埋落照風物澹歸烟翰墨三餘隙關山四望懸頽風睽
酌羽流水曠鳴絃雖欣承白雪終恨隔青天

和劉長史答十九兄

帝堯平百姓高祖宅三秦子弟分河岳衣冠動縉紳盛
名恆不隕歷代幾相因街巷塗山曲門閭洛水濱五龍
金作友一子玉爲人寶劍豐城氣明珠魏國珍風標自
落落文質且彬彬共許陶元亮同推周伯仁石城俯天
闕鍾阜對江津驥足方遐騁狼心獨未馴鼓鼙鳴九域

烽火集重闔城勢餘三版兵威乏四鄰居然混玉石直
置保松筠耿介酬天子危言數賊臣鍾儀琴未奏蘇武
節猶新受祿寧辭死揚名不顧身精誠動天地忠義感
明神怪鳥俄垂翼修蛇竟暴鱗來朝拜休命述職下梁
岷善政馳金馬嘉聲繞玉綸三荆忽有贈四海更相親
宮徵諧鳴石光輝掩燭銀山川遙滿日零淚坐沾巾友
愛光天下恩波浹後塵懦夫仰高節下里繼陽春

送李庶子致仕還洛

此地傾城日由來供帳華亭逢李廣騎門接邵平瓜原

野烟氛市關河遊望賒白雲斷巖岫綠草覆江沙詔賜
扶陽宅人榮御史車灞池一相送流涕向烟霞

早行

敞朗東方徹闌干北斗斜地氣俄成霧天雲漸作霞河
流纔辨馬巖路不容車阡陌經三歲閭閻對五家露文
沾細草風影轉高花日月從來惜關山猶自賒

途中

悠悠辭鼎邑去去指金墉途路盈千里山川亘百重風
行常有隊雲出本多峯鬱鬱園中柳亭亭山上松客心

殊不樂鄉淚獨無從

五言絕句

夜送趙縱

趙氏連城壁由來天下傳送君還舊府明月滿前川

附炯姪女臨鏡曉妝

林鳥驚眠罷房櫳曙色開鳳釵金作縷鸞鏡玉為臺妝
似臨池出人疑向月來自憐方未已欲去復徘徊

番禺沈葆和初校

楊盈川集卷二

番禺陶福祥覆校

楊盈川集卷二

序

王勃集序

大矣哉文之時義也有天文焉察時以觀其變有人文
焉立言以重其範歷年滋久遞為文質應運以發其明
因人以通其粹仲尼既沒游夏光洙泗之風屈平自沈
唐宋宏汨羅之跡文儒於焉異術詞賦所以殊源逮秦
氏燔書斯文天喪漢皇改運此道不還賈馬蔚興已虧
於雅頌曹王傑起更失於風騷儻俛大猷未忝前載洎

乎潘陸奮發孫許相因繼之以顏謝申之以江鮑梁魏
羣材周隋眾制或苟求蟲篆未盡力於邱墳或獨徇波
瀾不尋源於禮樂會時沿革循古抑揚多守律以自全
罕非常而制物其有飛馳倏忽倜儻紛綸鼓動包四海
之名變化成一家之體蹈前賢之未識探先聖之不言
經籍爲心得王何於逸契風雲入思叶張左於神交故
能使六合殊材並推心於意匠八方好事咸受氣於文
樞出軌躅而驪首馳光芒而動俗非君之博物孰能致
於此乎君諱勃字子安太原祁人也其先出自有周濬

哲文明之裔隱乎炎漢宏宣高尚之風晉室南遷家聲
布於淮海宋臣北徙門德勝於河汾宏材繼出達人間
峙祖父通隋秀才高第蜀郡司戶書佐蜀王侍讀大業
未退講藝於龍門其卒也門人諡之曰文中子聞風睹
與起予道唯揣摩三古開闢八風始擯落於鄒韓終激
揚於荀孟父福時歷任太常博士雍州司功交阯六合
二縣令爲齊州長史抑惟邦彥是日人宗絕六藝以成
能兼百行而爲德司馬談之晚歲思宏授史之功揚子
雲之暮年遂起參元之嘆君之生也含章是託神何由

降星辰奇偉之精明何由出家國賢才之運性非外獎
智乃自然孝本乎未名人應乎初識器業之敏先乎就
傳九歲讀顏氏漢書撰指瑕十卷十歲包綜六經成乎
朞月懸然天得自符音訓時師百年之學旬日兼之昔
人千載之機立談可見居難則易在塞咸通於術無所
滯於詞無所假幼有鈞衡之略獨負舟航之用年十有
四時譽斯歸太常伯劉公巡行風俗見而異之曰此神
童也因加表薦對策高第拜爲朝散郎沛王之初建國
也博選奇士徵爲侍讀奉教撰平臺鈔略十篇書就賜

帛五十疋先鳴楚館孤峙齊宮曠忌側目應劉失步臨
秀不容尋反初服遠遊江漢登降岷峨觀精氣之會昌
翫靈奇之胎蠻考文章之跡徵造化之程神機若助日
新其業西南洪筆咸出其詞每有一文海內驚瞻所製
九隴縣孔子廟堂碑文宏偉絕人稀代爲寶正平之作
不能奪也咸亨之初乃參時選三府交辟遇疾辭焉友
人陸季友時爲虢州司法盛稱宏農藥物迺求補虢州
參軍坐免歲餘尋復舊職棄官沈跡就養於交趾焉長
卿坐廢於時君山不合於朝豈無媒也其惟命乎富貴

比於浮雲、光陰踰於尺璧、著撰之志自此居多、觀覽舊章、翱翔羣藝、隨方滲漉、於何不盡、在乎詞翰倍所用心、嘗以龍朔初載、文場變體、爭構纖微、競爲雕刻、糝之金玉、龍鳳亂之、朱紫青黃、影帶以徇其功、假對以稱其美、骨氣都盡、剛健不聞、思革其弊、用光志業、薛令公朝右、文宗托末契而推一變、盧照隣人間才傑、覽青規而輟九攻、知音與之矣、知己從之矣、於是鼓舞其心、發洩其用、八紘馳騁於思緒、萬代出沒於毫端、契將往而必融、防未來而先制、動搖文律、宮商有奔命之勞、沃蕩詞源

河海無息肩之地、以茲偉鑒、取其雄伯壯而不虛、剛而能潤、雕而不碎、按而彌堅、大則用之以時、小則施之有序、徒縱橫以取勢、非鼓怒以爲資、長風一振、眾萌自偃、遂使繁綜淺術、無藩籬之固、紛繪小才、失金湯之險、積年綺碎、一朝清廓、翰苑豁如、詞林增峻、反諸宏博、君之力焉、矯枉過正文之權也、後進之士、翕然景慕、久倦樊籠、咸思自擇、近則面受而心服、遠則言發而響應、教之者逾於激電、傳之者速於置郵、得其片言而忽焉、高視假其一氣則邈矣、孤鶩竊形骸者、旣昭發於樞機、吸精

微者亦潛附於聲律，雖雅才之變例，誠壯思之雄宗也。妙異之徒，別爲縱誕，專求怪說，爭發大言，乾坤日月，張其文，山河鬼神，走其思，長句以增其滯，客氣以廣其靈，已逾江南之風，漸成河朔之制，謬稱相述，罕識其源，扣純粹之精機，未投足而先逝，覽奔放之偏節，已滯心而忘返，迺相循於跼步，豈見習於通方，信譎不同，非墨翟之過，重增其放，豈莊周之失，唱高罕屬，既知之矣，以文罪我，其可得乎？君以爲摘藻雕章，研幾之餘事，知來藏往，探賾之所宗，隨時以發其唯應，便稽古以成其殆察。

微循紫宮於北門，幽求聖律訪元扈於東洛，響像天人，每覽韋編，思宏大易，周流窮乎八索，變動該乎四營，爲之發揮，以成註解，嘗因夜夢，有稱孔夫子而謂之曰：易有太極，子其勉之，寤而循環，思過半矣。於是窮著蔡以像告，考爻象以情言，旣乘理而得元，亦研精而徇道，虞仲翔之盡思，徒見三爻，韓康伯之成功，僅踰兩繫，君所注見光前，古與夫發天地之秘藏，知鬼神之情狀者，合其心矣。君又以幽贊神明，非杼軸於人事，經營訓導，迺優游於聖作，於是編次論語，各以羣分，窮源造極，爲之

詁訓仰貫一以知歸希體二而致遠爲言式序大義昭然文中子之居龍門也睹隋室之將散知吾道之未行循嘆鳳之遠圖宗獲麟之遺制裁成大典以贊孔門討論漢魏迄於晉代刪其詔命爲百篇以續書甄正樂府取其雅奧爲三百篇以續詩又自晉太始元年至隋開皇九年平陳之歲褒貶行事述元經以法春秋門人薛收竊慕同爲元經之傳未就而歿君思崇祖德光宣與義續薛氏之遺傳制詩書之眾序包舉藝文克融前烈陳羣稟太邱之訓時不逮焉孔伋傳司寇之文彼何功

矣詩書之序並冠於篇元經之傳未終其業命不與我有注先謝春秋二十八皇唐上元三年秋八月不改其樂顏氏斯殂養空而浮賈生終逝嗚呼天道何哉所注周易窮乎晉卦又注黃帝八十一難幸就其功撰合論十篇見行於代君平生屬文歲時不倦綴其存者纔數百篇嗟乎促齡材氣未盡歿而不朽君子貴焉兄勛及勳磊落詞韻鏗錙風骨皆九變之雄律也弟助及助總括前藻網羅羣思亦一時之健筆焉友愛之至人倫所及永言存歿何痛如之援翰紀文咸所未忍蓋以投分

相期非宏詞說潛然擊涕究而序之分爲二十卷具諸
篇目三都盛作恨不序於生前七志良書空撰得於身
後神其不遠道或存焉

宴族人楊八宅序

僕聞八音繁會合其德者宮商萬壑沸騰殊其流者涇
渭方以類聚物以羣分出言斯應則四海之內可以爲
兄弟吾道不行則同舟之人可以成胡越夫俗徒擾擾
天下喧喧風雲竭而交道衰勢利行而小人長固知深
期罕遇所以縱傾蓋之談高契難并所以泣相知之晚

道之存也獨在茲乎楊八官金木精靈山河粹氣一門
九龍之紋冕四代五公之緒秩天資學業口談夫子之
文日用溫良身佩先王之德獨遊山水高步煙霞諸侯
聞之而願交三公禮之而爭辟暫同流俗薄遊朝市人
倫賞鑒同推郭泰之名好事相趨畢詣揚雄之宅爾其
年光六合草色三春膏雨零於山原和風滿於城闕遙
遙別館花開玉樹之宮望望八川苔發璜溪之水當此
時也披雲霧傲松喬坐忘樽酒之間戰勝形骸之外雕
蟲壯思則符彩驚人非馬高談則鏗鏘滿聽亶亶然信

天下之奇賞陶陶然誠域中之樂事若使陳雷可作攝
齊於廊廡之間管鮑再生擁篲於高門之外蓋因文會
共記良遊人賦一言同裁四韻

送東海孫尉詩序

東川孫尉文章動俗符彩射人官裁下士宜大夫之三
德運偶上皇作東南之一尉庸才擾擾流俗喧喧談遠
近爲等差叙中外爲優劣殊不知三元合朔九州同軌
蓬瀛可訪還疑上苑之中日月不占更似靈臺之下彼
其之子未爲後時凡我友朋無勞疑別徒以士之相見

人之相知必欲軒蓋逢迎朝遊夕處亦常烟波阻絕風
流雲散去矣孫侯遠離隔矣但當晨看旅雁君逢繫帛
之書夕望牽牛余候乘槎之客未能免俗何莫賦詩綴
集眾篇列之如左

登秘書省閣詩序

若夫麒麟鳳凰之署三臺四部之經周王羣玉之山漢
帝蓬萊之室觀星文而考南北大象入於璣衡披帝冊
而質龍神負圖出於河洛司先王之載籍掌制書之典
謨劉向沈研揚雄寂寞之士於茲翰墨馬融該博侍毅

文章之才此焉遊處莫不出言斯善有道則尊補黻其
德行珪璋其事業心同匪石達人千載之交手握靈珠
文士一都之會陶泓寡務紬素多閒命蘭芷之君子坐
芸香之秘閣徒觀其重欄四絕閣道三休紅梁紫柱金
鋪玉碣平看日月唐都之物候可知坐望山川裴秀之
輿圖在卽虹蜺爲之回帶寒暑由其隔闕豈直崑崙十
二瀛海千尋西州有百尺之樓東國有千秋之觀於時
五行金玉八月秋分風生閭闔之門日在中衡之道烟
雲悽慘白露下而四郊空林野蒼茫青天高而九州迴
登山臨水無非宋玉之詞高閣連雲有似安仁之興列
芳饌命雕觴扼腕抵掌劇談戲笑假使神仙可得自蔑
松喬富貴在天終輕許史間之以博奕申之以詠歌陶
陶然樂在其中矣登高而賦羣公陳力於大夫聞善若
驚下走自強於元晏輕爲序引綴在辭章

崇文館宴集詩序

天下之器也神立貳者所以經其化聖人之寶也大建
儲者所以贊其庸易所謂照於四方禮所謂貞於萬國
皇家以中樞北極清都有天子之宮儲后以大火前星

蒼震有乾男之位因心也孝常問安於寢門行已也恭
每不絕於馳道有父子君臣之道焉有夏干冬羽之事
焉於是發德音降明詔封紫泥於璽禁傳墨令於銀書
齒於成均所以明其長幼通於博望所以昭其賓客東
方曼倩之文史卽預禘詞角里先生之羽翼仍參獻壽
爲賓者四友等黃龍之簡才論奏者八人同赤烏之下
士莫不縉紳舊德縫掖名儒衣簪拜高闕之門驂駕陪
直城之路琢磨其道玉質而金相黼黻其詞雲蒸而電
激琴書暇景風月名辰周旋揖讓觀禮儀之溢日合異
離聖聞辨論之盈耳八珍方饌寒溫取適於四時一獻
雕觴賓主交歡於百拜爾其清垣繚繞丹禁逶迤魚鱗
則環鎖晨開雀牕則銅樓旦闢周廬綺合廨署星分左
輔右弼之官此焉攸集先馬後車之任於是乎在顧循
庸菲濫沐恩榮屬多士之後塵預羣公之末坐聽笙竽
於北里退思齊國之音觀瓌寶於東山自恥燕臺之石
千年有屬咸蹈舞於時康四座勿諠請謳歌於帝力小
子狂簡題其弁云

李舍人山亭詩序

永嘉有高陽公山亭者今爲李舍人別墅也廊宇重複樓臺左右煙霞棲樑棟之間竹樹在汀洲之外龜山對出背東武而飛來鶴阜相臨向東吳而不進青溪數曲赤巖千丈寥廓兮惚恍似蓬嶺之難行深邃兮眇然若桃源之失路信可謂赤縣幽棲黃圖勝景從來八子闢高陽之邑居今日四郊逢舍人之置驛故知樊家失業遂作庾公之園習氏不遊終成濮陰之地其人也凝脂點漆瓊樹瑤林學富文史言成準的葭葦爲漢帝之親枝葉是周公之裔田孟嘗之待客照飯無疑孔文舉之

邀懽樽中自溢三冬事隙五日歸休奏金石而滿堂召琳瑯而觸目心焉而醉德焉而飽大隱朝市本無車馬之喧不出戶庭坐得雲霄之致於是乎百年無幾萬事徒勞唯談笑可以遣平生唯文詞可以陳心賞旣因良會咸請賦詩雖向之所歡已爲陳跡俾千載之下感於斯文

送徐錄事詩序

徐學士風流舊舊容貌堂堂汝南則顏子更生洛下則神人重出書有萬覽之者實符於鄭元州有九游之者

頗類於班固懷岐嶓之舊迹想江漢之遺風粵在於永
淳元年孟夏四月始以內率府錄事出攝蒼溪縣主簿
同彼漆園之莊周聊居賤職異乎安平之梁竦不殫勞
人駢驂而欲行紛紜而戒道是日也鶴鳴于野龍昇于
天詩成流火之文易占清風之卦聖主以協時同律義
在於省方皇儲以守器承祧任隆於監國留臺務靜博
望時閒於是久敬之善交平生之故友臨御溝而帳飲
就離亭而出宿居成別易坐覺悲來平原二客追子高
而已遠河上諸公餞林宗而有慕兩鄉風月萬里江山
脩路爲下泣之思長天非寄愁之所何以處我戒之必
軾何以贈行上路不拜孫子荆傾國之送豈若是乎潘
安仁金谷之篇盡於斯矣

送并州旻上人詩序

三元日月不能改弦望之期四序炎涼不能移變通之
運况乎人生天地嶽鎮東西良辰美景始雲蒸而電激
臨水登山忽風流而雨散道之常也復何言哉旻上人
天骨多奇神情獨王法門梁棟豈非龍象之雄晉國英
靈卽是河汾之寶道尊德貴所以名稱並聞盡性窮神

所以身心不動徧觀天下暫遊城闕劉真長之遠致雅
契高風習鑿齒之宏才深期上德芝蘭一面暫悅新知
垂棘連城將遊舊府雞山法眾餞行於素滄之濱麟閣
良朋祖送於青門之外是日也河山雨氣原野秋陰風
烟淒而禁籞寒草木落而城隍晚雲中振錫有如鴻鵠
之飛水上乘杯更似神仙之別左右爲之魂動金石由
其色變恒山岱岳看寶鼎於風雲帝里神州對長安於
白日兩鄉綿邈何當惠遠之遊千里相思空有關山之
望羣賢僉議咸可賦詩題其爵里編之簡牘

晦日藥園詩序

天下皆知禮之爲貴用周旋揖讓之儀天下皆知樂之
爲盛節金石絲簧之變是則忠信之溥飾容貌於矜莊
風俗之微陶性靈於歌舞殊不知達人君子遺形骸於
得喪之機心照神交混榮辱於是非之境非若諸公者
大夫之相知也以爲烟霞可賞歲月難留遂欲極千載
之交歡窮百年之樂事莫不如珪如璋令聞令望濟濟
鏘鏘同會於文場者也於時丁丑之年孟春之晦歲陰
入於星紀斗柄臨於析木衣冠雜沓出城闕而盤游車

馬駢闐俯河濱而帳飲乃有神州福地上藥中園左太
沖所云當衢向術潘安仁以爲面郊後市九莖仙草搖
八卦之祥風四照靈葩泣三危之寶露豈直帝神農旋
赤鞭而驅毒崔文子擁朱幡以救人山圖採之而得道
姮娥竊之而奔月若斯而已哉加以回溪漱石茂林脩
竹澹風日之逶迤妙山泉之體勢然後芳杜若藉芝蘭
高論參元飛觴舉白凡我良友同聲相應心冥寵辱推
富貴於皇天事一窮通任運隨於大命若使適情知足
則玉帛子女爲伐性之源達變通機則尊官厚祿非保
全之地所以列坐羲皇之代安歌帝堯之力陽光稍晚
高興未闌請諸文會之游共紀當年之事凡厥衆作列
之於後

羣官尋楊隱居詩序

若夫太華千仞長河萬里則吾土之山澤壯於域中西
漢十輪東京四代則吾宗之人物盛於天下乃有渾金
璞玉鳳戢龍蟠方圓作其輿蓋日月爲其扃牖天光下
燭懸少微之一星地氣上騰發大雲之五色以不貪爲
寶均珠玉以咳唾以無事爲貴比旂常於糞土諸侯不

敢以交遊相得三府不敢以辟命相期與夫形在江海
心游魏闕跡混朝市名爲大隱可得同年而語哉天子
巡於下都望於中嶽軒皇駐蹕將尋大隗之居堯帝省
方終全潁陽之節羣賢以公私有暇休沐多閒忽乎將
行指林壑而非遠莞爾而笑覽烟霞而在矚登塊坳踐
莓苔阮籍之見蘇門止聞鸞嘯盧敖之逢高士詎識鳶
肩憶桑海而無時問桃源之易失寒山四絕烟霧蒼蒼
古樹千年藤蘿漠漠誅茅作室挂席爲門石隱磷而環
階水潺湲而匝砌乃相與旁求勝境遍窺靈跡論其八
洞實惟明月之宮相其五山卽是交風之地仙臺可望
石室猶存極人生之勝踐得林野之奇趣浮杯若聖已
茂松喬清論凝神坐驚河漢游仙可致無勞郭璞之言
招隱成文敢嗣劉安之作

宴皇甫兵曹宅詩序

皇甫君冠冕於安定李校書羽儀於隴西岑正字明目
於漢南石宮坊抵掌於河朔高侯邦之司直下走齊之
濫吹若夫風雲龍虎水火陰陽隔千里而應之莫不潛
契於同聲矣聖明千載區宇一家奄八紘以得之莫不

高會於中京矣是日也河圖適至海鯨初死五嶽四瀆
漢皇帝崇其望祀一日三朝周天子展其莊敬君臣慶
色朝野歡心元晏先生開甲第而留賓二三君子赴龍
門而廣讌陰雲已墨肅氣彌高霜寒萬里之園冰納干
金之水面郊後市即為潘岳之居累代通家咸言李膺
之客百年何計相知在於我心四海何求為樂止於名
教抽毫進牘皆請賦詩日暮途遠聊裁序引

番禺沈葆和初校

番禺陶福祥覆校

楊盈川集卷三

